



USCF CCT TAKWIMU

UNIVERSITY STUDENT CHRISTIAN FELLOWSHIP
CHUO CHA TAKWIMU



**RIPOTI YA UTAFITI WA AWALI
KWAAJILI YA ENEO LA MISION 2025.**

UTAFITI UMEFANYIKA MKOA WA MTWARA.

**USCF CCT CHUO CHA TAKWIMU
#We Serve a Living GOD
2025 MTWARA MUST BE SAVED.**

**RIPOTI YA UTAFITI WA ENEO LA UMISIONI
MKOANI MTWARA HALMASHAURI YA MJI NANYAMBA
(14/07/2024 – 17/07/2024)**

1. UTANGULIZI

Marko Mt 16:15, “Akawaambia, Enendeni ulimwenguni mwote, mkaihubiri Injili kwa kila kiumbe. Aminiye na kubatizwa ataokoka; asiyeamini, atahukumiwa”.

Bwana Yesu asifiwe, USCF TAKWIMU imeandaa huduma ya umisioni inayotarajiwa kufanyika mnamo mwezi wa pili mwishoni mwaka 2025 mkoani MTWARA katika Halmashauri ya mji wa NANYAMBA.

Kipekee tunamshukuru MUNGU kwa neema ambayo ametupa kuweza kutembelea eneo la umisioni katika mkoa wa MTWARA, Halmashauri ya Mji NANYAMBA. Utafiti huu uliweza kufanywa na katibu msaidizi wa USCF TAKWIMU, Bw. BARAKA FRANCIS na kiongozi idara ya tehamu USCF TAKWIMU, Bw. JOHN SHADRACK.

Tunamshukuru MUNGU tuliweza kupokelewa vyema na katibu msaidizi wa makanisa ya CCT MKOA WA MTWARA, Mch. Ezekiel Shikombe ambaye ni mchungaji kiongozi katika kanisa la AIC(T) pastoreti ya MTWARA mjini tarehe 14/07/2024 siku ya Jumapili.

2. MALENGO

Yoshua 2:1a, “Yoshua, mwana wa Nuni, akawatuma watu wawili kutoka shitimu kwa siri, ili kupeleleza, akawaambia, Enendeni mkaitazame nchi hii, na Yeriko”.

Lengo kuu la kufanya utafiti huu ni pamoja na kuangalia eneo la umisioni na mazingira yake kwa ujumla ambayo yatakuwa rafiki katika upatikanaji wa huduma mbalimbali za msingi kama vile; huduma za maji, umeme na chakula, mahali pa kupumzikia wanaUSCF na watumishi, eneo la mkutano na huduma nyinginezo.

3. MAFANIKIO

Kwa neema ya MUNGU, Jumatatu ya tarehe 15/07/2024, tuliweza kuanza utafiti wa kimisioni katika mkoa wa MTWARA, mji wa NANYAMBA. Tuliweza kufanya utafiti katika mji wa NANYAMBA ambao una kata mbili, ambazo ni NANYAMBA na DINYECHA.

Vitu ambavyo tuliweza kuviangalia na kuvizingatia katika utafiti wa eneo la umisioni ni pamoja na;

- i. Masaa ya kusafiri.
- ii. Hali ya hewa.
- iii. Shughuli za kiuchumi zinazozunguka.

- iv. Mahali/makazi ambapo watakaa watumishi Pamoja na wana fellowship.
- v. Huduma za maji na umeme.
- vi. Upatikanaji wa kuni & maduka.
- vii. Miundombinu,mazingira na ulinzi.
- viii. Mekanisa yanayopatikana katika eneo hilo la umisioni.
- ix. Hali ya makanisa.
- x. Ushirikiano wa makanisa.
- xi. Idadi ya huduma za kijamii zinazozunguka eneo la umisioni.
- xii. Aina za vyakula vinavyopatikana karibu na eneo la umisioni.
- xiii. Eneo la mkutano.
- xiv. Changamoto za watu wanaozunguka eneo hilo la umisioni.
- xv. Historia fupi na utamaduni wa watu wanaozunguka eneo la umisioni.
- xvi. Upatikanaji wa vyombo vya muziki.
- xvii. Upatikanaji wa mahitaji ya jukwaa.

Eneo ambalo tumefanikiwa kufika ni; **NANYAMBA MJINI**

I. Masaa ya kusafiri.

Masaa ya kusafiri kutoka DAR ES SALAAM hadi MTWARA Mjini ni takribani masaa yasiyopungua 10 na kutoka MTWARA Mjini hadi NANYAMBA Mjini ni takribani lisaa limoja na nusu hivo kufanya muda kwa ujumla kutoka DAR ES SALAAM hadi NANYAMBA Mjini kuwa ni masaa yasiyopungua Kumi na moja na nusu.

II. Hali ya hewa.

Hali ya hewa kwa kipindi cha mwezi Februari mwishoni hadi mwanzoni mwa mwezi Machi inakuwa ni mvua kama ilivo msimu wake.

III. Shughuli za kiuchumi.

Wakazi wa NANYAMBA Mjini wanajishughulisha na biashara pamoja na kilimo cha Korosho, mihogo, ufuta, karanga, njugu na viazi vitamu.

IV. Mahali/makazi ambapo watakaa watumishi na wana fellowship.

Mahali ambapo tunategemea watafikia wana fellowship na watumishi ni rafiki na salama sana na suala hili tumeliacha chini ya wachungaji viongozi wa makanisa wenyeji ambao wameahidi kulifatilia na kutupatia mrejesho juu ya suala hilo.

V. Huduma za maji na umeme.

Huduma za maji na umeme kwa mahali pa kupumzika na eneo la mkutano zinapatikana kwa urahisi.

VI. Upatikanaji wa kuni & maduka.

Kuni zinapatikana kwa urahisi na kwa gharama ya kuanzia Tsh. 1000/=. Pia maduka yapo karibu na eneo hilo.

VII. Miundombinu, mazingira na ulinzi.

Miundombinu na mazingira ya eneo tunalotegemea kufanya umisioni ni salama kwa ajili wote ambao kwa neema ya MUNGU tutashiriki kufanya umisioni, pia ulinzi wa mali zetu na maeneo yote tutakapokuwa kwa kipindi chote cha umisioni upo wa kutosha. Lakini licha ya mazingira kuonekana kuwa salama bado kuna upinzani wa kiimani kutokana na kuwa makanisa haya yapo katika ukuaji wake.

VIII. Makanisa yanayopatikana katika eneo hilo la umisioni.

Makanisa wanachama wa CCT yanayopatikana katika mji wa NANYAMBA ni pamoja na KKKT, Anglican, Moravian, AIC(T) na makanisa yasiyo mwanachama ni pamoja na EAGT, TAG, Full Gospel Church na Kanisa Katoliki.

IX. Hali ya makanisa

Mpaka sasa makanisa ambayo yana majengo ya kudumu ya kuabudia ni mawili ambayo ni KKKT Pamoja na Anglican. Kwa upande wa AIC(T) na Moravian wana majengo ya muda tu ambayo huyatumia kuabudia huku wakiendelea na mchakato wa kupata maeneo ya kudumu kwa ajili ya kufanyia ibada. Pia idadi ya waumini katika makanisa yote haya ni ndogo sababu hayana muda mrefu mahali pale.

X. Ushirikiano wa makanisa

Ushirikiano wa makanisa wanachama wa CCT katika mji wa NANYAMBA bado ni mdogo sana hii ni kutokana na kuwa makanisa yameanzishwa hivi karibuni. Ushirikiano uliopo ni wa makanisa matatu ambayo ni KKKT, Anglican na Kanisa katoliki ambao wana umoja unaoitwa UMOJA WA MAKANISA.

XI. Huduma za kijamii zinazozunguka eneo la umisioni.

Huduma za kijamii zilizopo karibu na eneo la umisioni ni kama ifuatavyo;

- ❖ Shule{shule tatu(3) za msingi ikiwemo shule moja yenye Watoto wenye mahitaji maalum na shule mbili(2) za sekondari}
- ❖ Hospitali{Hospitali mbili(2), moja ikiwa inamilikiwa na Kanisa katoliki na nyingine ikiwa ni ya serikali lakini pia kuna hospitali ya halmashauri ya mji wa NANYAMBA ambayo ipo Maili chache kutoka katika eneo pangwa kwaajili ya umisioni}
- ❖ Soko
- ❖ Kituo cha polisi na mahakama
- ❖ Usafiri wa umma

XII. Aina za vyakula vinavyopatikana karibu na eneo la umisioni.

Aina za vyakula vinavyopatikana karibu ama kuzalishwa kwa wingi katika eneo la umisioni ni Pamoja na Korosho, Mihogo, njugu, karanga, viazi vitamu na Samaki(wakubwa kwa wadogo). Pia kuna upatikanaji mkubwa wa mbogamboga kwasababu ya uwepo wa bustani kubwa zinazolimwa mahali pale. Na vinywaji vyote pia vinapatikana kwa urahisi.

XIII. Eneo la mkutano.

Eneo la mkutano ni kubwa na linafikika kutoka mahali pa kupumzika, kiwanja kipo Katikati ya mji ambapo panafikika kwa urahisi kutoka sehemu mbalimbali za mji wa NANYAMBA.

XIV. Changamoto za watu wanaozunguka eneo hilo la umisioni.

Changamoto zilizopo ni pamoja na imani kwani asilimia kubwa ya watu wa mahali pale ni waumini wa dini ya kiislamu, pia kuna watu wanaoamini katika ushirikina na wengine wakishikilia mila potofu na zilizopitwa na wakati. Lakini pia asilimia kubwa wa wakazi wa eneo hilo hawana elimu ya kutosha kwa upande wa elimu ya darasani.

XV. Historia fupi na utamaduni wa watu wanaozunguka eneo la umisioni.

Wakazi wa NANYAMBA Mjini ni watu wenye asili ya Umakonde, na wenye kushika mila na desturi kwa baadhi yao na nyingi hutokana na Imani yao ya kiislamu.

XVI. Upatikanaji wa vyombo vya muziki.

Upatikanaji wa vyombo vya muziki katika eneo ambalo kutafanyika huduma ya umisioni ni changamoto kidogo japokuwa kutokana na maelezo ya wenyeji tunaweza kupata vyombo vichache kama vile spika, mixer na microphone lakini kwa vyombo kama kinanda, gitaa na ngoma haviwezi kupatikana kwa eneo hilo.

XVII. Upatikanaji wa mahitaji ya jukwaa.

Kwa upande wa mahitaji ya jukwaa kama mbao na mirunda havipatikani kwa urahisi kidogo katika eneo la umisioni lakini kuna uwezekano wa kupata baadhi ya majukwaa ya kufunga kutoka kwa wamiliki wa eneo ambalo tunategemea kwenda kufanyia mkutano ambao ni kanisa katoliki na hili limeachwa mikononi mwa wenyeji wetu na kuwa watalifatilia na kutupatia mrejesho.

4. CHANGAMOTO

Changamoto ambazo tulikutana nazo ni pamoja na umbali kutoka MTWARA Mjini hadi NANYAMBA mjini hivyo kupelekea kuwa na gharama kubwa ya usafiri wakati wa kwenda na kurudi mahali ambapo tulipofikia. Pia kulikuwa na ongezeko la nauli kutoka Tsh. 35,000/= ambayo ndiyo iliwekwa kwenye bajeti yetu hadi kufikia Tsh. 39,000/= kutoka DAR ES SALAAM hadi MTWARA. Lakini pia ilikuwapo changamoto ya kifedha ambayo ilifanya utafiti kufanyika kwa ufanisi mdogo kwa hofu ya kutoka nje ya bajeti iliyoandaliwa.

5. MAPENDEKEZO

Kutoka kwa wachungaji wenyeji

- Kufanya matendo ya huruma hasa kuitembelea shule ya Watoto wenye mahitaji maalumu na kutoa vifaa ambavyo vitawasaidia katika kujifunza.
- Kutembelea hospitali kwaajili ya kuwaona wagonjwa
- Kutembelea shule za msingi na sekondari na kama itawezekana kugawa taulo za kike kwenye shule ambayo ina wanafunzi wa advanced level ambao ni wa kike tu.
- Kuleta mwandishi wa Habari siku ambayo matendo ya huruma yatakuwa yakifanyika kwaajili ya kufanya kitu kuwa kikubwa na kizuri zaidi.
- Kuwa na vyombo kwaajili ya kuhifadhia maji ili kuhakikisha upatikanaji wake muda wote yanapohitajika.
- Kuanza kukusanya kuni na mkaa mapema ili kupunguza ugumu wa kupata kuni kipindi ambacho kutakuwa na mvua nyingi.
- Kwenda na machapisho na biblia ambazo zitakuwa zikigawiwa kwa wale watakaokuwa wakipelekewa injili.
- Kuandaa mipira au vifaa vingine vyovyote ambavyo vitaachwa kwa wale ambao tutafanya nao bonanza la michezo.
- Kuwa na semina kwa wale watakaokoka kuhusu kuendelea kukua kiroho baada ya kuupokea wokovu.
- Kuwa na nidhamu binafsi katika kipindi chote cha huduma ikiwa ni Pamoja na kuwa na namna nzuri ya uvaaji wa mavazi (kwa wadada pale ambapo hakuna haja ya kuvaa vitu kama suruali na nywele bandia basi visivaliwe).
- Watumishi kuwa na imani katika yale wanayoyahubiri na sio kuamini katika upako wa vitu kama mafuta na maji.

❖ **Mambo muhimu ya kuzingatia**

- Kushughulikia mapema vibali vyote ambavyo vinahitajika kupata ili kufanya mkutano mahali pale
- Kuendelea kuwa na mawasiliano zaidi na wachungaji wenyeji ili kuweka maandalizi kuwa mazuri zaidi

❖ **Ushauri**

- ✓ Sio kila hali inayotokea inahitaji kutolewa hitimisho la kuwa ina uhusiano na mambo ya kiroho, zipo hali ambazo hutokea kutokana na msimu Fulani mahali hapo mtakapokuwa hivo ni vizuri zaidi kujifanyia semina juu ya namna nzuri ya kushughulika na hali ambazo hutokea katika mazingira tofauti ili kuepuka kutumia nguvu kubwa katika kushughulika na mambo madogo.

❖ **Kuhusu idara ya muziki**

- ✓ Kushughulikia kupata vyombo vya muziki kama vile kinanda, gitaa na ngoma na kuongeza baadhi ya vifaa kama microphone ili kuhakikisha kuna idadi kubwa ya vyombo na vyenye ufanisi kipindi chote cha huduma.

❖ **Kutoka kwa watafiti**

- ✓ Kuongeza bajeti kwaajili ya kazi zote ambazo zitakuwa zinahusiana na utafiti ili utafiti ufanyike kwa ufanisi mkubwa bila ya kuwa na changamoto ya kifedha ambayo inafanya baadhi ya taarifa za muhimu kutokukamilika.
- ✓ Kupata camera yenye uwezo mkubwa ili kuongeza ufanisi katika utafiti.

6. HITIMISHO

Zaburi 124:1, “Kama si Bwana aliye kuwa pamoja nasi na Israel aseme sasa”.

Tunamshukuru MUNGU kwa namna ya kipekee mno, ambaye alitufanikisha katika kuifanya kazi hiyo maana hakika bila yeye tusingeweza kuyatimiza hayo. Tunawashukuru pia viongozi wa USCF TAKWIMU kwa kutuombea na kushirikiana nasi vema katika kulikamilisha jambo hili, zaidi ya hayo tusichoke katika kuifanya kazi ya MUNGU na tuzidi kuhamasishana sisi pamoja na wanachama wenzetu kwani Umisioni umeshaanza rasmi.

Mwisho, **1 Wakorintho 15:58, “Basi, ndugu zangu wapendwa, mwimarike, msitikisike, mkazidi sana kutenda kazi ya BWANA siku zote, kwa kuwa mwajua ya kwamba taabu yenu siyo bure katika BWANA”.** Hivyo basi, kutokana na utafiti huo tunapenda kuwataarifu kuwa huduma yetu ya Umisioni kwa mwaka 2025, itafanyika Mkoa wa MTWARA, halmashauri ya mji wa NANYAMBA. MUNGU atusaidie na tuifanye kazi yake kwa ukubwa kwa ajili ya utukufu wa jina lake takatifu.

Ezra 10:4, Inuka; maana shughuli hii yakuhusu wewe; na sisi tu pamoja nawe; uwe na moyo mkuu, ukaitende.

MUNGU AWABARIKI.